

四庫全書

集部

欽定四庫全書

兩宋名賢小集卷一百二十八

宋 陳思編

元 陳世隆補

傅忠肅公集

傅察字公晦孟州濟原人也從曾祖曰堯俞有傳察  
為人端重有特操舉進士蔡京欲妻以子察力拒之  
為青州司法參軍歷永平溜川丞久之除太常博士

遷吏部員外郎宣和七年接伴金使時金人已渝盟  
察至燕山聞斡里雅布兵至金人曰見太子當拜察  
曰太子雖貴人臣也當以賓禮見何拜為斡里雅布  
曰汝主失信吾興師南向海上之盟不可恃也察曰  
皇帝與金國講好信使往來項背相望何謂失信太  
子干盟而動意何所為乎敵左右但使拜白刃如林  
察曰死則死耳豈有俱人臣而輒拜者或抑猝使伏  
地察植立衣冠顛倒始終不屈斡里雅布曰爾乃不

拜我耶麾令去察知不免謂其下曰彼脅我以拜我  
義不辱我死必矣我父母老素鍾念我聞之必大戚  
若等得脫幸記我言以告我親知我死國稍解其無  
窮之悲也左右盡泣既次燕山遂見殺年三十七聞  
者哀之贈徽猷閣待制

用廉夫韻招諸友登清微

束帶縛吏事發狂中憤興世情多面朋噂沓惡背憎緬  
懷數君子皎皎瑩壺冰披雲見顏色翠光露鋒稜忘形

到坦率高論破炎蒸藹然嘉譽在映我獨無稱文場屢  
交鏑師老畏侵陵况復時雨過綠苗覆千塍便當共臨  
眺此興那可勝孤亭枕簟住下有寒潭澄仰看霞綺散  
坐待月華升嘲咏縱歡謹明朝期再登

廉夫有會當歸去來之句復次前韻

少小尚奇偉長年病莫興折腰仕五斗詎敢論好憎居  
然畏罪苦局如履春冰每懷鷹隼翮鞫上看鋒稜追隨  
縉紳後糠覈雜肴烝泮宮天下士藉甚得儒稱巍巍衆

峯上跛足豈易陵朝廷重薦延拔茅餘空媵公孫富經  
術非子誰能勝坐見萬頃波颺瓦缶汲逾澄沛然下膏澤  
翁若朝雲升勿云歡留滯青史他年登

次韻廉夫登清微二首

蝸舍不容膝煩敲局寢興豈惟倦束帶絺綌猶云憎清  
微跨城角宰兀疑凝冰深池暮黯黯遠岫朝稜稜往歲  
與申子賓朋日雲烝遂令棟宇陋顧盼流名稱先生今  
詩伯氣欲青雲陵鏘然出佳句椒蘭布畦塍邀我避暑

遊意重愧難勝何

缺

神明自清澄嗟彼浮名者

此亭豈易升跼蹐恐

缺

時攝衣請先登

大火氣方熾新金伏未興茅屋若卑陋蘊毒空自憎流  
汗常被體滌煩屢飲冰那堪青蠅輩鼓翅作威稜薰風  
爍炎日沸鼎助薪蒸每思謀爽塏地溢舊無稱高亭枕  
城隈粉堞勢騰陵清水繞其足茂林瞰田塍此間有異  
趣躋攀弗能勝佳招適我願坐覺神魂澄何當卜隣舍  
與子朝夕升飄然忘世累長嘯效孫登

次韻祝廉夫登高樓

膏雨潤四野草木蘇中乾駕言共臨眺凌雲陟層盤華  
宇蔭曦日潯暑隨風闌清談無俗好茶果有餘歡撥置  
簿領煩憩此簟席安悠然得佳趣可以寄簪冠耳目去  
局促心體自廣胖何如斂手版觸熱事上官晚來纖謁  
霽矯首欣遐歡一見沒天外千林杳雲端西山有爽氣  
淺綠浮巔岼翻疑圖畫裏未覺雲夢寬蕭蕭林間蟬  
已如咽暮寒直恐霜露至歸歟可忘餐



同七兄寄二李

昔我在淇水二陸皆少年伯也氣軒昂丹鶴唳青田季  
方文章士摘花桃李妍力學乃未已有如火始然相見  
一傾蓋便誦膠漆堅笑語玉塵折登臨蠟屐穿時時出  
秀句灑若沈疴痊爾來踰十歲自當冠貂蟬胡為茅屋  
下寂寞尚草玄方今明堂構收拾棟與椽安得刷羽  
翮吹噓送上天此志儻不遂何用空言傳不如李翰林  
沉醉自稱仙不如陶彭澤歸來謝塵緣但解琴中趣何

妨甕下眠富貴草頭露名譽空中烟子意竟何如余心  
方寂然願求真實語莫作猾頭禪

夏日登清微亭

永日留煩暑斯樓得屢登向來如異境高處若無憑遠  
岫生雲直輕風撼浪層試取金掌露更接玉壺冰抵掌  
賓朋盛題詩氣象增望窮遺恨在我欲醉時升

清微亭分韻得空字

縹緲千層外縈紆一經通飛甍明落日巨棟掛斜紅當

眺資公退招邀得調同九天開浩蕩萬衆入牢寵水色  
連暗碧雲容借晚空清來庾公興快挹楚王風缺側金  
罍倒樓昏畫角終明朝車馬客陡覺厭塵紅

大暑同蔣明亞叟熙載夜登清微亭

土潤伏新金陽歌困亭午曦御駐征驂朱光微厚土鳥  
雀噪堦除蛙蚓鳴草莽簿領抗塵容茅簷茫環堵蜂蠆  
亂繩牀蚊蟲隱雷鼓棕拂徒爾為青蠅敢予侮避喧空  
百慮對食但三吐舉策未搖風揮汗已成雨那能整冠

巾誰復對賓主豈惟眩生花坐覺氣如縷南方有高樓  
兀然蔽華宇摳衣倦躋攀策杖愁偃僂俄頃叩雲端飄  
蕭開洞府新涼颺爾來舊暑脫然愈清池涌波瀾疎星  
穿牖戶夜氣襲冰霜月明粲珪組烏鵲倦飛還遊魚渚  
可數珍果走金盤清談揮玉麈羣籟正囂囂幽夢方相  
相何當食瓊漿一夕生毛羽

夜登清微亭雲陰掩翳東北有雨少頃月出皎然  
復次前韻

欽定四庫全書

卷一百二十八

融融暑未闌悄悄夜方午命駕聊叩門尋幽得茲土俯  
矚但蒼茫前瞻何鹵莽萬籟正虛無羣生各安堵蟬嘯  
雜笙簫蛙鳴當鐘鼓鳬鵠政參差詎諧懼狎侮豈惟冠  
蓋傾已覺肝膽吐坐久隱奔雷天邊垂密雨疎木列賓  
朋衆峯自臣主螢火落明星爐烟裊青縷那能缺酒杯  
所欣瞻德宇高歌屢激昂笑喜或俛僂蕭颺濯塵襟清  
虛湛靈府快如仙爪爬灑若頭風愈須臾出金盤照耀  
開玉戶映浪雜瓊瑰穿簾間壁組斯遊豈前謀後會難

逆數歡餘岸綸巾語約揮松塵可能伴雞栖亦復隨蝶  
相廣寒會可升試為刷翎羽

次晁之道韻

翰林詩百篇發興自斗酒同遊八仙中七者顏已厚邇  
來數百年斯人那復有風流東城晁四海蔚稱首之子  
乃其豪異代得密友滿腹貯詩書妙意寓醪酎政使譽  
日新位卑未為醜亭亭澗底松不如園中柳芝菌冠衆  
芳其出未枯朽叫閣問大鈞得致君側否

送承祖赴定州幕府

中山控北陲，強弩號百萬。單于銜國恩，方且事逃遁。謀帥得真儒，不煩一戰頓。風流本江左，壘壘有餘論。幕府極妙選，參謀不容遜。藉甚丞相孫，凌雲氣豪健。所懷社稷計，嘗願竊有獻。蹭蹬三十年，羈旅頗自困。因人作遠遊，實亦乖素願。談笑青油幕，聊復可排悶。嗟余謬不學，塵根苦遲鈍。一官聯事久，矜式每自勸。但覺有不如，未見有寸進。公亦不吾厭，叩擊愧煩溷。念當為遠別，悵然

亦多恨時方苦炎蒸行矣靳強飯

伯時往河東戲與廉夫分韻道相思之意三首

日月劇跳丸暫別亦已久青山繚層巔道里阻且右今  
晨登南樓會此同志友思公聊北望竚立但搔首秋風  
八月天霽色明朝牖軒車何時來遲爾一杯酒

朝氛霽西山晚日明蒼蔚遙憐太行上陟巘眩可畏王  
侯眇小夫中盤凌雲氣端如車公賢談笑出真誹胡為  
久崎嶇使我重吁歎王事有程期來歸懼其未



之子何磊落本是青雲才  
安翅蓬蒿下鰲面垂髯懸卜  
鄰與我遊肝膽向人開酒酣遺世累  
謔浪絕嫌猜西風換煩燠四野無纖埃  
方當共臨眺公兮胡不來

題毛彥謨容膝軒

夫子負異才端若會稽竒平生懷剛腸於世少許可文  
詞類激昂議論恥媿嬰高名三十年坐此常坎軻同時  
英俊流往往步青瑣歸來樂簞瓢琳宮得安坐小軒僅  
容膝陋巷生堀堞惟餘豪俠氣屢折每不挫却眠利名

場終身繫韁鎖生雖華屋居死我翳蓬顆固知宇宙間  
所有終非我但當清我心餘事等么麼

次七兄韻

蝸舍蒔為門清風無所扇閒視纔半尋起行空百轉對  
食不下喉流汗常被面矧復鳬鷺行摘尾抱大卷余方  
有公事汝輩宜罷遣賴此伯仲賢縱談逞雄辯時時雜  
博奕豈不賢遊燕呼奴取具來據榻聊一戰初如兩軍  
交整陣咸伺便俄頃鋒刃集解紛在一箭或喜而拊掌

或駭而色變或旁睨而審或當局而眩剥剥伐木聲離  
離衆星見勝負既已分反奩若收電却尋文字觀觸物  
本無戀覓句屢吟哦誦詩乍游衍百謫勿相聞從渠書  
我殿

晚登清微亭次祝教授韻

雉堞亭亭倚翠微高樓裊裊弄清暉共邀佳客扶筇  
杖驟喜涼風振羽衣過雨山川顏色好投林鳥雀噪聲  
稀月搖翠浪明珠碎雲滿金波破鏡飛雄辯琅琅如落

屑新詩句句似連璣自憐怪僻耽幽寂却恨匆匆便賦歸

送朱熙載改官還鄉

陶唐名臣有朱虎揖遜夔夷尊文祖後來傑出漢雲孫  
折楹當時誰敢侮煌煌聖代見斯人凜凜遺風振千古  
乘牛不數魯家使衣錦何妨買臣窶十年牢落困膠庠  
五斗栖遲尚環堵惟餘豪氣自不除傾蓋向人肝膽吐  
忽然結束事征鞍軒軒氣色浮眉宇謂予倚門親久待

况復楓宸拜明主朝廷公卿重薦延騫騰一鶚生毛羽  
高義如君世所稀早據要路思裨補

芝堂

弘度負土忘晨夕空腸未忍進一溢伯會隆冬不衣帛  
野火燎原天雨澤當時廬側產靈芝盛事至今光史冊  
王家兄弟皆英豪藉藉聲華若連壁高文奧學乃餘事  
一門躬行如萬石孝思他日徹蒼昊血淚垂頤灑枯栢  
雖云草木但有生始信幽明本無隔煌煌二秀發坤祥

小大高低紫與白  
搢紳駭歎絕前聞  
老稚提攜溢阡陌  
爭言圖舄獻修門  
坐見恩榮來絡繹  
公獨掩耳更悲啼  
吾忍貨名於寔  
寧豈知採摘付兒童  
大勝簞贏金滿千  
鎰方當孝治軼唐虞  
八行求賢常側席  
公雖韞匱畏人知  
定有新詩振奇蹟

雪九首

都城十日雪庭戶皓已盈  
呼兒試輕掃留伴小窻明  
天公亦戲人奇幻驚倏忽  
朝來簷雷間一一綴明月  
晚風掃連氛客被增夜峭  
明朝赴看燭更把崑山照

高堂連夜賞蛾眉映珠櫳誰憐閉門客衣穿履亦空  
黑雲埋日車厚雪鎮坤軸行路勿匆匆包藏恐深谷  
忽驚陋巷間踏作瓊瑤迹坐聞郢中歌妙句壓元白  
春雷忽隱隱春雪復紛紛農夫戒及澤荷鋤已成雲  
撒鹽乍可擬刻楮竟難成研辭覩天巧應復召羣生  
盈尺兆嘉祥三登賀亨泰我雖無寸田一飯猶足賴  
次韻杜無逸西園獨坐九絕句

南浦送微波西山來遠綠日暮獨盤旋慨焉撫孤竹

前輩不可見古道邈難尋何時赤松子相與歸山陰  
折腰為五斗我已愧淵明共赴東林約悵然懷友生  
虛齋篆爐烟兀然得禪寂雖有錦繡腸畫餅安可食  
亭亭澗底松幹凌雲霜孤既無鸞鳳翔鳥雀來喧呼  
一世競榮利紛若空中花蚤作田園計人生會有涯  
身遊闌闌間心在孤雲杪譬如登太山頗覺天下小  
外慕亦無已及身良有餘乘流如可迹韞匱豈藏諸  
聖德覆天下歡然萬物春北窗微笑傲似是義皇人



題張季良適性齋

揚雄家無甌石儲閉門作賦擬相如鄴侯插架多異事  
牙籤萬軸吞石渠吾友張子斯人徒嗜好醎酸與衆殊  
被褐懷寶老不癯收拾萬卷以自娛但願生為蠹書魚  
咀嚼英華味道腴揮毫落紙驚羣儒佳處往往凌子虛  
網羅秦漢包唐虞上下千載歸指呼自言此樂世所無  
不羨潭潭卿相居方今清廟收璠璣肯使滄海遺明珠  
高明他日播天衢行看旌帛來庭除

任伯仲時德并用均父韻送德父守菑川邀余

同賦

妙齡擢秀如黃童藉甚詞林振古風  
瀾翻千載常在口磊落萬卷獨蟠胸  
不將龜筮論從逆獨向詩書有高識  
琳宮乞得十年閒可但新詩勝疇昔  
一麾自出治東萊洗眼看公手重拭  
疲民安堵身暫休黠吏垂頭聲不出  
人言功效真卓爾歸近高堂渾舍喜  
喜公才氣

更難量致君要著巖廊裏秋雲漠漠向空飛  
颯颯涼風生桂枝馬蹄又踏東川去盤水洋  
洋可樂飢我今作吏愧無補夢寐林泉那得  
歸會抽手版付丞相却掃庭闈戲綵衣卜鄰  
儻許依仁里與子艱難共生死釣竿伴我訪  
滄溟沮如定無三尺鯉

送傅倅五首

洛之水兮其流舒舒公之來兮朱服熊車士

元展驥仲舉題輿公之來兮民斯樂胥

沼之水兮其流洋洋公之化兮春雨秋陽袴襦頌洽  
禾黍歲穰公之化兮民期悅康

沼之水兮其流瀾瀾公之去兮旌旗旖旎父老攀轅  
縉紳方軌公之去兮瞻望徙倚

沼之水兮其流洄洄公之德兮此邦所惻吏遵其畫  
人懷其惠公之德兮久而無替

沼之水兮其流活活公之名兮茲其彌達翔於朝著

寓於省閨公之名兮莫我敢過

贈朱令中泮宮

折桂陪英彥彈冠接宋寮志連秦壁固論鄙楚師恍  
逸驥終難繫翔鸞詎可邀緬懷巖下士終得夢中宵

吏隱亭會集

招攜共到習家池雲水為裳芟製衣魚戲輕船浮枕  
簟鷗隨落日下汀磯岸巾已得杯中趣橫吹如從天  
外飛野性每來應未厭驪駒寧復賦言歸

尉治吏隱亭三首

公餘吏隱新亭野，濶雲低疊素屏風。  
荷花翻偃蓋，日搖波影散疎星。  
望窮南畝千重綠，坐久西山數點青。  
更待晚涼蟬亂噪，與君散策試同聽。

一番新雨洗華亭，四面晴天倚翠屏。  
並秀採蓮舒嫩臉，孤飛白鷺帶殘星。  
披襟驟覺登仙樂，倚檻猶疑倒影青。  
橫笛晚來聲更好，龍吟泓下亦時聽。

十五伯以詩見贈，因次韻為謝。

蕭然顏巷復誰堪  
竟日潛心到五三  
載酒未妨從靖節  
圍棋端不羨羊曇  
逢人傾倒羣兒笑  
落筆縱橫四座慙  
舊學青箱知未替  
更將新律付諸男

次韻申泮宮直宿早秋四首

新秋爽氣溢長空  
絃誦低昂月映櫳  
濟濟青衿成魯變  
洋洋泮水詠洙風  
羣儒篆刻空章句  
百氏紛紜賴折中  
何日拔才空冀北  
如今高譽滿山東  
皎皎清波滿四空  
疎林散影弄朦朧  
援毫欲賦陽臺夢

振袂欣乘玉宇風已覺素秋來席上却疑仙景落壺中  
凌雲未許攀仙桂卧看冰輪沒漢東

一方明月落長空萬里餘輝鑠玉櫳蟬韻啾啾來遠木  
槐雲裊裊弄清風共邀載酒陶彭澤走訪談經戴侍中  
景物蕭然無限思靚粧應許過牆東

泮宮深閉絳帷空遙想佳人照綺櫳閒倚畫屏憐永夜  
懶搖紈扇引涼風直疑令史歸天上猶想陽臺入夢中  
展轉覺來無一事日搖槐影過窗東



又次申教授直宿三首

皎皎虛堂帶月清  
金風入律露華明  
潘郎遇直生秋興  
韓子長歌憶短檠  
驚鵲繞枝巢未穩  
幽蟲臨砌隱餘聲  
却嫌詩思撩歸夢  
數盡高城長短更

擾擾浮名絆此生  
相逢樽酒眼還明  
君如俊鶻方搏翮  
我似彎弓不受檠  
弱植幸容依玉樹  
新詩嘗喜擲金聲  
他時會致青雲上  
莫厭卑棲歲屢更

秋堂襍被有餘清  
驟喜秋光潑眼明  
簾外月華篩碎玉

牀頭螢火當長檠豈嫌唧唧秋蟲響還聽琅琅弦誦聲  
善教尚煩留滯席朝恩未許便歸更

同工曹至臨洛道中禾黍蔚然喜而有作呈朱令  
甘雨初勻歲事時冥冥造物本無私綠雲捲地薰風細  
翠浪翻天曉露滋已見郊原深沒馬預欣場圃積如坻  
從來令尹憂民切短句聊憑一解頤

方量牧地次韻工曹王亞叟

朝廷庶事備成康郡邑承風底事忙要使幅員無曠土

始知異北有留良疎狂似我徒勞耳術業如君時易量  
奔走幸容陪笑語每觀醉墨屢琳琅

杜無逸留別次韻三首

薰蒸和氣浹豐年羸老欣聞詔令宣疾惡如讎知勁節  
清言有味樂推賢却嫌松菊荒三徑故乞絲綸下九天  
欲識邦人思厚德四郊草木亦依然

汪汪萬頃浸清波千里旁漸惠澤多化比宋均方渡虎  
瑞同黃霸自生禾盤根治劇觀游刃破膽投姦去宿疴

已有謳吟喧井邑更傳佳句似陰何

一官塞北似飄蓬邂逅威嚴霽弱翁他日若陪林下客  
亦能把釣待秋風

無逸用前韻見謝復次韻

藉藉聲名自妙年優優惠化詠來宣寧誇衣錦光前牒  
便擬揮金繼昔賢秀句屢同歌白雪高標猶幸視青天  
自慚不得陪駟御空想餘風尚凜然

一麾聊復散餘波才比淮陰益辦多千里宣威愴夏日

三年種德斂秋禾如綸忽聽頒新渥勿樂還欣已舊疴  
却恐九重思治行蒲輪他日竟如何

鵬飛初不礙蒿蓬自擬歸休慕仲翁况有仙姿標洞府  
冷然禦寇已乘風

和鮑守次韻林德祖十四首

南宮三日仕非輕湖海歸來一草亭譽襲芝蘭方冉冉  
節高松柏獨青青仁風已播袁宏扇素尚行須毛玠屏  
豈待期年歸報政人占此地有台星

莊周蝴蝶夢魂輕盤谷山家有舊亭下筆未能工婉白  
折腰何敢望紆青思魚此日空彈鋏誤墨他年點畫屏  
寂寞草玄繩戶閉猶堪歸伴少微星

五月黃塵去傳輕褰裳幾處宿郵亭共知何日輸心赤

公詩有報國  
身輕之句

莫歎微霜點鬢青

公詩有白  
頭之歎

每傍重霄求

寶劍欲令新木作枯屏流傳賸有風騷句遙想羣公若

會星

思分千里賞猶輕好建精思李柏亭日映冰壺融皎潔

風臨玉樹發葱青高名競慕蒲葵扇雅操寧施刻鏤屏  
夢得惠連春草句虛傳李白是金星

氣蓋千人一羽輕九霄丹鶴唳華亭姓名已入金甌覆  
留滯休嗟銀印青彩筆挾天摘麗藻高標插地見長屏  
鹽梅他日從人望商說何功比列星

聖代勤民宣外輕聲名今已播邊亭風搖鈴閣終晨靜  
雨鎖棠陰滿地青賜表殊功宜冕服榮分從吏亦題屏  
如公學問留閤郡東壁何人應二星

十年塵土坐才輕五斗猶堪佐縣亭  
鼎貴敢歆新綬紫  
途窮唯有舊羶青  
已甘終作輪囷木  
未忍翻同屈曲屏  
猶喜膺門被客接  
常瞻郎位對堂星

銀鈎落紙彩毫輕  
醉寫新詩入禁亭  
學擅儒宗窮壺奧  
文摘墨妙炳丹青  
親承零露如金掌  
密蔽衝風似寶屏  
雅意未須嗟出守  
宵衣方念庶民星

九萬鵬程舉翮輕  
蚤年高譽滿江亭  
曾分蘭省趨墀赤  
行從荷囊拜瑣青  
雅度最宜鏘玉佩  
精忠不用錄沉屏



欲令行部檐帷去要使人爭識景星

久嗟留滯厭叢輕桃李無言向野亭展驥始應流汗赤  
登龍早見出藍青三餘共對賢人酒四野欣瞻別駕屏  
何日蒲輪趨召節便看兩兩映魁星

半刺同流寄未輕勤勞每念離鄉亭高懷不羨貂蟬貴  
麗句還酬玉案青字買千金休擇筆才兼三絕好書屏  
獨慙後學波瀾狹明月舒空映小星

淮陰當日少年輕官舍渾如寄旅亭十載淒涼甘組紱

三冬諷誦伴燈青才非徐孺慙懸榻諂異陳咸豈觸屏  
獨幸親逢陶謝手每觀一字並華星

佐縣三年敢意輕掾曹還許暫平亭齒延屢醉爭扶白  
嗣響非工愧取青自此浮鷗容海浪幸同馴鹿傍車屏  
從今已恐終更去悵望參商是別星

使軺問俗畫輪輕五馬張筵駐驛亭他日恩榮封詔紫  
佇看蹇諤伏蒲青才能並賜龍文劍勲業同分雲母屏

太史已書賢者聚荀陳此地仰華星

沈和仲過郡鮑  
欽止固留飲宴

七月二十五日登舟

暫來征騎出闌闌，却棹扁舟下小津。  
颯颯西風如送客，蕭蕭晚雨欲留人。  
一年蹤跡無停日，千里羈遊又遠親。  
為問篙師從此去，定知幾日到東秦。

野宿

沂水秋風揚短棹，穿林落日繫孤舟。  
心清乍喜離囂俗，野曠翻疑動旅愁。  
歸雁高飛雲杳杳，幽蟲夜語草悠悠。  
此間景物君知否，即是瀟湘一片秋。

晚發

理棹頻看谿水分岸移不覺轉孤村漁翁醉卧灘沙穩  
樵子行歌草樹昏白鷺成行低欲落清蟬無數斷還聞  
須將野色并秋色都付詩魂與醉魂

過灤次衡元度韻

山雲漠漠水溟溟千里拿舟似葉輕乍喜晚光偏照耀  
却嫌秋色太分明疑人鷗鳥看來熟殢客荷花望處平  
佳景直須乘興入蚤催風伯送吾行

再阻風次衡元度韻

阻風三日不舂糧浪逆篙橫未到莊碧水預知饒夜月  
青山已復下殘陽每吟秋興空多渡欲賦西征細作行  
行止定非臧氏力艱難險阻自須嘗

次韻烹茶四首

移種疑從紫府仙世間凡草護芊眠味高石密甘居下  
效捷靈芝愧在前玉缺並標官焙印月團猶帶御爐烟

年來海宇皆知

缺

却笑神農未解煎

劉夢得茶歌  
帝雖嘗未解煎

吏隱從人號爛仙一甌常及日高眠要令萬卷澆胃次

便覺三山到眼前客至不須樽有酒家貧肯厭突無烟

清泉近在南山麓珍味殊勝渭水煎

白樂天有渭水煎來始覺珍之句

不但蠲煩起醉仙能令古莽失多眠

見列子

春風乍拂千

巖上曉雨初霑百草前絳縷囊包紫壁

杜牧之詩牙香紫壁裁

玉塵凝盃照清烟

李郢詩有玉塵煎出照碧霞

今人嗤點前人拙未

肯須依古法煎

徐鉉詩任道時新物須依古法煎

仰望羣公若會仙貪論茗飲未安眠冥搜往往遊塵外

得句時時在枕前夜漏嘔吟清徹骨晴窗揮染淨無烟

中秋風月佳晨近應把雲腴對竹煎

季衛公詩拈吟對竹煎

槐堂二首

慇懃當日植文槐志在經綸世豈知古栢空傳武侯廟  
甘棠爭誦召公詩頽簷共惜成陳迹夏屋初欣敞舊規  
豈但一時追盛事高名從此看雙垂

鬱鬱庭柯已百年相傳勿翦豈徒然魯棲鸞鳳枝條聳  
直傍雲霄雨露偏彩制乍驚增昔構佳名還喜契台

躔故知異日思遺愛爭指新堂說二賢

季良寵示牡丹長句謹賦三首

一見奇葩潑眼明兩州風物寄爭新  
十家京洛供長日萬朵東秦照暮春  
諦視尚疑傾國女醉吟猶付謫仙人  
定知不是無情物為有真香暗度頻

僕家近洛陽而常官青社故云

紫檀刻藥香初吐紅粉勻葩色正新  
孤艷最宜微帶雨衆芳誰復與爭春  
無端應恨風驚葉不醉却宜花笑人  
從此徑須連夜賞遶欄百匝未為頻



如酥小雨壓芳塵曲檻重來花更新莫怪東風鍾共美  
獨將仙種殿餘春愧非阿母池邊客喜見陽臺夢裏人  
猶恨此生輸蛺蝶偷香抱藥往來頻

題毛彥謨容膝軒

缺

意未疎歸來端為憶吾廬縱談衮衮皆忘倦  
豪氣飄飄尚不除賴有一經如長孺休嫌四壁似相如  
小窗宴坐無餘事門外頻聽長者車

次毛彥謨韻

平生貴異不謀身率道恂恂范伯孫  
卷有青衿來問道  
家無赤腳可應門  
抗章曾叩蒼龍闕  
讜議終開白獸樽  
見說晚聞多妙教  
悠悠浮世更堪論

南溪會集

傳聞公退集羣英  
共指殘春到野亭  
高柳半天成翠幄  
遙峯插地作長屏  
應憐曠寂囂塵絕  
更覺蕭疎梅象  
冷顧我阻陪車馬  
客空吟河畔草青青

淡蕩春溪帶晚城  
勝遊此地繼蘭亭  
風搖波面瑠璃簾

雨洗山光翡翠屏  
舉酒莫辭歸酩酊  
垂綸聊復向清冷  
會須踏月重追賞  
要看林烟共罩青

次韻任伯仲和均父詩

數子聲華久絕塵  
更將詩律鬪清新  
爛如曉日鋪紅錦  
穆若薰風泛綠蘋  
王謝由來多大手

詢任伯仲詩

何劉那得

比斯人

語均父

從今海內流傳徧  
在處常應護鬼神

九日次韻邢子友

側身西望涕沾翰  
黃菊丹萸又滿欄  
徧挿定應憐我遠

從遊誰復盡親歡年過騎省悲秋易貧似司空乞酒難

何日故園鳴雁侶醉歸松竹挂衣冠

司空圖九日詩黃菊斯開乞酒難孟

浩然詩烟紅鋪藻翰松竹挂衣冠

### 贈毛謨彥二首

相逢晚歲莫情疎徑欲連牆卜並居苦學羨君詩有味  
困窮憐我食無餘從容杯酒頻揮塵斗擻塵埃喜振裾  
問道談言更轉漏故應回首萬緣虛

歎息朝廷記憶疎未聞平子賦閒居窮經豈但論糟粕

樂道寧能逐腐餘已覺烟霞親几杖不教塵上污簪裾  
客來強起談名理寂莫茅齋盡日虛

馬上作

心逐輕波去身隨匹馬歸據鞍揮淚盡回首一依依  
夢覺

日永不可過夜涼愁更多蟬聲明晚月孤枕夢如何  
思家

一別遽如許歸期可奈何無心戀明月有淚寄流波

七月十一夜涼風驟至即事書懷三絕句

涼飈此夕何佳哉  
萬里朱炎去不來  
吹入離人多少恨  
却將魂夢到陽臺

蕭蕭初覺淡雲輕  
颯颯如聞轉樹聲  
收拾光輝渾在眼  
應如騎省賦初成

窗外時聞一葉落  
槐陰驚起幾蟬鳴  
秋風定是多情物  
解作離腸欲斷聲

七月十六夜對月

空捲天高鳥鵲飛滿庭槐影轉風枝可憐秋色誰分付  
正是安仁作賦時

牡丹三首

侍中宅畔千餘朵興慶池邊四五枝何似城南王處士  
滿園無數鬪新奇

無奈狂風日日推東君欲去復徘徊應緣衆卉羞相並  
故遣妖姿最後開

半醉西施暈晚粧天香一夜染衣裳躊躇欲畫無窮意

筆法何人繼趙昌

聞有遊蔡氏園看牡丹詩戲作一絕呈季良

車騎雍容駐道傍  
小園尋勝見花王  
應知異日傳佳句  
處處人稱黃四娘

海棠二首

恰恰清明昨夜過  
海棠幽獨占春多  
杜陵不是無心賦  
才薄難工奈若何

欲識東君用意工  
故將殘葉襯輕紅  
可憐雨洗胭脂濕



只怕風吹翠幄空



兩宋名賢小集卷一百二十八

欽定四庫全書

集部

兩宋名賢小集卷一百三十九至  
三十四

詳校官中書<sub>臣</sub>閔思毅

助教<sub>臣</sub>常循覆勘

總校官編修<sub>臣</sub>王燕緒

校對官助教<sub>臣</sub>汪錫魁

謄錄監生<sub>臣</sub>朱恩

欽定四庫全書

兩宋名賢小集卷一百二十九

宋 陳思 編

元 陳世隆 補

飄然集

歐陽澈字德明撫州崇仁人建炎初徒步走行在伏  
闕上書請誅汪黃等與陳東俱死於市紹興中贈祕  
閣修撰有飄然先生集

醉中食鱸歌

君不見秋風未發鱸正肥張翰思歸心欲飛又不見田  
文有客歌彈鋏為嘆無魚聲激烈水晶細鱸落金盤須  
信江南味中絕山谷曾名醒酒冰一筋未嘗延俗客助  
盤橙橘薦甘酸入口瓊瑤碎牙頰扶起嵇康頽玉山滌  
破樂天醉吟魄烹龍炮鳳未云珍策勲終是愧霜鱗江  
湖散人興不淺為羨此品常垂綸有時舉竿獲錦鯉玉  
屑花中拚爛醉笑他大嚼市廛流浪說屠門能快意靈

運池中蓄頗多揚馨鼓鬣戲清波知我平生嗜此癖霜  
刀細縷紅玉搓典衣沽酒試犇飲纈紋入面春風和平  
生逸氣射牛斗功名未必常蹉跎醉來擊劍歌白雪閒  
愁萬斛俱消磨俗態翻雲仍覆雨世情炙手復張羅丈  
夫富貴當自致恥傍權門效女羅雄圖自許羞俯仰請  
看毫端食鱸歌

七夕後一日寄陳巨濟

去年七夕待試臨川二三友從遊於巽溪閣江山氣

象如在冰壺玉鑑中汝川勝槩一目而盡酒酣興發  
舒戔點翰爭賦新詩以攄逸氣今年七夕憂患沮喪  
胸臆結束強追談笑會諸友飲於蘧軒眼對景物緬  
懷舊事愴然驚怛黎明欲遣人問巨濟動靜戲作古  
詩以供捧腹

高樓昨夜西風轉耿耿銀河雲葉卷擎空皎月弄嬋娟  
領畧溪山堪指點秋光次第磨青銅一味清涼襲庭院  
遙知天外鵲橋成牛渚黃姑會佳燕凭高翻憶鳳樓人

慙慙乞巧陳芳莫可堪目斷心旌搖砌成幽恨無人展  
促樽欣得莫逆交脉脉閒愁憑理遣清狂舉白話平生  
午夜香然殘寶篆淒涼此際憶年時爛漫瓊樓興不淺  
重遊寥陽洞有感

尋真曾到寥陽殿小立廊腰花影轉飛瓊仙子下瑤臺  
綽約雲鬟眼波剪水沉烟斷一簾秋醉睡海棠紅玉軟  
武陵歸去探年華揚州夢覺江波遠重來風物恰依然  
愛日融融素烟卷洞門寂歷鎖長春異木槎枒插天半

霞衣冉冉媚東風，綠鎖窓前重識面。  
酒酣春笋理琵琶，曲終依約含幽怨。  
人間名利幾時休，馬蹄不駐空留戀。  
桃花流水古猶今，回首碧雲人不見。

和答德秀長句

摩雲標格儒林秀，濯濯美如春月柳。  
毫顛文陣轟雷槌，字勢龍蛇翻天矯。  
才名藉甚燭景星，卓然可獨尊南斗。  
締交雲路許攀鱗，談我諄諄不離口。  
層樓長記聳詩肩，吟苦任渠嘲太瘦。  
暗中輕擲道途人，相視誰論報瓊玖。



強披斐句答慙懃當恕人才有能否

古詩寄游良臣兼簡陳國鎮

齋鹽興淺知無策謝絕歸來事清白亂絲心緒尚紛如  
時對風簷獨捫虱會看稽古補前愆赤水遺珠不難索  
仰公學問日芳新磨礱幸偶謫仙人遙知議論到佳處  
眉間喜氣常津津我慚蹤跡浪萍梗欲親斐几嗟因循  
飛奴寥落絕問福渴心依約生埃塵以膠投漆貴耐久  
回光借燭期知貧情均骨肉非有素白玉琢成心始固

莫學紛紛輕薄兒世情翻覆成雲雨登雲依舊高嵯峨  
指掌江南勝槩多佳眠風物未入夢疑泛靈槎遊絳河  
竭來乘興須一往飛觴爛醉橫秋波磨門況有金閨彥  
筆驅麗景森吟哦悠悠此志遂何日款段相期踏雪過

夢仙謠

良臣拉僕醉於臨川巽溪閣江山勝槩一目殆盡滿  
飲巨觴惟恐告竭酒酣興發猖狂不知所如遂爛遊  
花柳適有奇遇灑然非塵土之境醒而思之恍如夢

覺噫浮生荏苒時一夢耳而於夢之中適有好夢焉  
豈容於默默作夢仙謠以紀其盛事云知其夢者試  
揮鳳藻以繼韻否

寥陽洞口風烟好枯木槎枒插雲島重重金鎖遶婁娟  
滿地落花常不掃蕭郎聞說已乘鸞空餘九轉燒丹竈  
烟霞截斷絕非塵凡夫蹤跡無由到高陽有客攜佳侶  
訪異尋幽豁襟抱瓊樓酒散恣歡遊誤入蓬壺如夢覺  
雲闕初叩聞無人松梢鶴唳如驚報須臾參戶迎者誰

吳宮女兒面凝脂指點蘭堂篆烟裊珠箔玲瓏宰地垂  
高擎翠袖輕輕捲半露妖嬈素蓮臉嫣然一笑啟檀脣  
喚我躋堂語聲軟相隨環坐一軒秋旋列杯盤供雅宴  
倚風仙藥似有情競吐芳苞噴香遠朝雲一段下陽臺  
綽約標容塵世鮮黛眉輕拂遠山青明眸斜盼秋風剪  
蘭柔柳弱不禁風睡起芙蓉香體顫櫻桃緩啟歌貫珠  
夕陽花外流鶯轉曲終低語愈含情自訴芳心猶未展  
苞藏惟恐泄真香尋常嬌怯羞鶯燕為憐坐客俱多才

拚羞試許求相見安然若有惜花情願丐錦章鐫琬琰  
溫柔淑惠已無雙更聽斯言真絕艷放懷舉白不暫停  
酷嫌鸚鵡杯中淺醉玉頰山卧綺窓秋水一牀凝角簾  
悠颺好夢入巫峯洩洩溶溶興正濃遽然夢覺一何有  
點綴餘霞散眼封依約餘香散滿袂行雲縹緲已無蹤  
壺中天地古來有默想風物遙應同我聞劉阮曾迷路  
武陵邂逅如花女靈丹咀嚼頓輕身脫洗紅塵已仙去  
又聞仙去有蕭防曾耦雙成飲玉漿一朝誤入華陽洞

予飛終許學鸞凰仙凡異境無憑據每笑前聞但虛語  
豈意親逢事偶符始信人間有奇遇歸來燈火欲黃昏  
隱几無聊暗追慕濡毫始作夢仙謠端欲夢魂重默悟

寄周居安

周郎辭氣帶烟霞凜凜秋霜嚼齒牙塵尾動思談吐屑  
筆頭遙想夢生花三年幸獲從遊款一別那知歲月賒  
遠欲飛奴傳翰墨顏筋柳骨儼秋蛇

秋試下即事有感寄國鎮

籬菊金英噴異香  
杜門岑絕獨持觴  
風掀脫葉橫斜舞  
雲襯平林淺淡黃  
塞管有情增哽噎  
野花無緒伴淒涼  
不禁景物撩秋眼  
剩與新篇付錦囊

戲促朝宗酒約

雨收雲海湧金盆  
簾捲香絲破篆文  
小立不妨人解珮  
閒眠應有客書裙  
未饒靈運吟春草  
端憶長庚醉暮雲  
顧我從容尚無躁  
韓公何惜為三薰

春日書事

寂寂園林照日遲  
花梢經雨漫臙脂  
輕烟薄縠籠深塢  
細草援菰蘸小池  
暖力著人添醉聖  
韶華入眼逼詩脾  
賞心不惜千金價  
冷笑閭閻數米炊

春霽

繡出園林霽色新  
長郊芳草綠無垠  
日籠瑞氣輕浮幌  
風掠花芬暗襲人  
蝶慕竊香爭趁暖  
鶯思求友競啼春  
試將何物澆詩膽  
活火調湯濺玉塵

臨溪弱柳



柳弄嬌黃暖律催臨溪約畧笑殘梅鴨頭春水回環綠  
龜甲屏山掩映開媚日依依籠霧閣搖風裊裊拂烟梳  
柔絲恨不同攀折獨立江臯首重回

原上晚步聞笛有感

一笛誰橫透晚空傷懷真作鳥窺籠解龜換酒無知己  
拾穗行歌說屢豐沐雨秋山遮眼碧舞風霜葉點溪紅  
老農植杖來相問籍草高談夕照中

遣興示子賢

安貧萬事祇隨緣羞澀囊空乏一錢濁酒難賒應有恨  
焦琴屢典已無絃飯盂抄雪惟求飽茗盃翻濤喜自煎  
錦里先生有詩卷破愁時誦兩三篇

傅巖居士挽詞

夢寐江湖僅十年桑榆投老逋林泉知人襟抱藏英鑒  
奇我風標喚謫僊妙論梨花今已矣遺編憂玉尚依然  
桐焦里巷知音少幾對雲齋欲斷絃

涉傅巖有感簡朝宗

招提清曠竭來遊潑墨嵐光眼界幽黃絹碑亡思子禮  
碧雲詩好憶湯休風簷目送書雲雁烟塢愁聞喚雨鳩  
銷爍睡魔澆洗盃桐窓拾得一枝秋

陳欽芳時寓盤龍作詩寄之因紀吟咏之美

凜凜冰霜嚼齒牙沈沈清夜詠簷花摩雲氣逸干星斗  
落紙詞妍帶綺霞醉掃麝煤奔渴驥困紆象管引秋蛇  
擬尋紅樹賡詩社却日揮戈不許斜

讀傅巖居士舊詩軸有感

黃鵠凌雲不可尋遺音流落感人心朱顏綠鬢留難駐  
明月清風古到今韞櫝有時驚卞璞絕絃無地置牙琴  
傳巖蕭瑟傷心處一局文楸鎖竹林

朝宗見和復自韻謝之

拾得佳篇李賀門鸞牋重錄教諸孫清於月夕瀟湘水  
淡似清秋太華雲發藥例雖霑騰馥鈎深應寡與元文  
何時紅樹尋詩社琢句令傾漱灑樽

歸途遣興借朝宗韻簡敦仁

緩著歸鞭水石鄉  
息鞍箕踞小橋傍  
烟滋竹葉雙叢玉  
秋著蘆花一岫霜  
潑眼溪山增爽氣  
襲人蘭蕙破幽香  
擬提吟筆扛洪鼎  
反笑虬蟄不自量

自鷺橋復用前韻

旗亭解轡詠江鄉  
屬玉雙飛綠澗傍  
水墨園林初過雨  
青黃橙橘未經霜  
鼎烹雲液澆腸爽  
窺潑春醅破鼻香  
回首漫驚烟水遠  
向來清味怯思量

和顯道筠軒有作

欲引秋聲竹旋移吟烟時一啟柴扉了無俗狀到公眼  
每有清風襲客衣地癖不知炎暑老身閒潛覺道心微  
茫茫塵事俱臧穀羞偶問閭較是非

和世弼蓼花

糝點千叢蘸碧流寧甘淡泊對清秋白蘋許共搖風細  
黃菊欣同占景幽羞泄異香招舞蝶獨施繁艷伴漁舟  
憎騰醉眼牽情處贏得淒涼一段愁

謝人惠紫竹杖

王猷珍重惠龍孫策險扶危價莫論  
爛醉懸錢過酒肆  
狂吟步月打僧門  
虛心尚有凌雲操  
勁節元無染淚痕  
寄語香山老居士  
朱藤從此未為尊

和前韻紀登高醉中景示世弼諸友

芳晨秋興浩無涯  
結客凭高酒旋賒  
送目喜觀雲縹緲  
狂歌誰顧帽欹斜  
笑他子美看茱實  
要學樊川插菊花  
競說今年幸逢閏  
再期攜手躡烟霞

和子賢對景有感次九日韻

醉撥春雲一甕香  
潛欣積雨破秋陽  
燈龕宜入詩書府  
錢杖慵吟水色鄉  
忘慮不斑潘岳鬢  
養恬難斷廣平腸  
賞音誰謂無蕭穎  
時綴雄文弔戰場

世弼原上晚望和韻見寄因復之

綠消暮靄滿空秋  
念遠凭高隴上遊  
一片孤雲生遠岫  
數聲哀雁落寒流  
風前無緒愁聞笛  
天際何人誤識舟  
步月可尋岩下叟  
試將圓玉鎮神頭

鳩杖吟行笑撥雲  
多疑賈島是前身  
名高鄭谷耕烟叟



樂過嚴灘釣月人俯聽鳴蛩爭唧唧潛看宿鳥各親親  
田家有秫俱爲酒乘興何妨徧訪隣

州學貴中庭上作

漠漠陰凝水墨天雨絲成陣拂窻前千層疊巘籠輕靄  
一帶澄江鎖淡烟歸思似雲空散亂名蹤如葉尚留連  
當時錯笑悲風賦今日閒愁須默然

秋日居山

振衣拂曉啟松扃月淡風清酒漸醒密竹含烟爭滴翠

幽蘭浥露遠聞馨清憐高潔蟬嘶柳間羨優游鹿食苹  
試枕碧流端洗耳白雲深處誦黃庭

一抹輕烟鎖遠山眼前瀟灑脫塵寰投林宿鳥相呼喚  
出草飛螢自往還吟擬停杯邀月飲醉斲支枕伴雲閒  
因風拾得新詩句獨倚高梧笑解顏

寄良臣

耳冷清談倏半年渴心如憶嶺頭泉自慙記迹多南北  
無復從遊學聖賢莫謂卑飛同斥鷃已全高潔慕鳴蟬

荒涼不厭幽居趣  
假道何妨試着鞭

督德秀還酒會

綠鎖窻前聚首時  
戲彈圓玉偶輸機  
侑觴既欲攜紅袖  
送酒何妨遣白衣  
醕酢預期歸倒載  
從容端的話玄微  
揮戈直使潁陽却不計  
西風隱半歸

臨川戲留友人

山童澤酒欲金流  
小雨簾纖陡變秋  
河朔飲徒方快意  
鱸魚歸興不如休  
歌姝況有飛瓊侶  
結客當為擲果遊

一曲陽關腸斷盡未應聞此不遲留

子賢和韻見酬次答之

詩名浪得在盧前  
器識慙非叔度賢  
捉月笑他吟采石  
凌雲端欲賦甘泉  
發硎喜淬衡牛劍  
啟齒羞談使鬼錢  
平世未應徒爾爾  
行藏終與古人肩

和子賢秋日晚望

溪山潑墨水雲秋  
似綺餘霞次第收  
燦燦拒霜鋪蓼嶼  
雙雙屬玉舞蘋洲  
杳無錦字來憑雁  
擬減機心試狎鷗

望裏碧雲還又合數峰江上忍擡眸

朝宗以詩贈行和酬二篇一以留別一以謝詩

漱醪常共醉琳瑯魚目慙游漲海傍  
琴聽雅音彈碧玉鼎分靈劑煉玄霜  
纏腸錦繡篇章麗入室芝蘭燕寢香  
欲別未應徒爾爾鵬程萬里事難量

鍛鍊新詩摘錦囊筆驅秀麗汝川傍  
氣橫阿劍疑干斗韻入豐鐘必待霜  
道勁狂揮毛穎疾淋漓醉掃麝煤香  
珠璣喜就鮫人乞收拾端期百斛量

輕風破暖

單衣初試輕寒退  
嫋嫋軟風襟袖快  
層樓高捲酒旗斜  
綺陌亂飄花  
錦碎多情故把惱人腸  
楊柳陰中弄暗香  
解貂不惜換斗酒  
爛醉春光能幾場

杜宇啼紅

蜜脾香滿青春暮  
寂寂空山聞杜宇  
啼紅泣綠怨東風  
錦城舊恨懷千古  
可堪腸斷對樽前  
雄圖未遂愁無邊  
賴有提壺勸我飲  
起舞從教落醉船

喜雨

北窓支枕夢初回  
風掠餘香特地來  
顛倒衣裳望池上  
荷花無語為誰開

楊柳藏鴉菡萏香  
水亭風榭襲羅裳  
秋光正入詩人眼  
剩得餘篇付錦囊

歸自臨川途中感物遇事寄秀美

信馬沿堤懶着鞭  
不堪回首望臨川  
滿懷離恨如春夢  
愁聽林梢斷續蟬

啾唧蛩吟旅况淒那堪孤枕酒醒時夢魂栩栩知何處  
依約幽軒話別離

寔含月影夢初回一枕淒涼眼懶開幽恨閒愁本無種  
根苗不識是誰栽

有寄

懽騰醉眼漾嬌波心印潛通一捻多密寄斷腸雙麗曲  
過雲須倩雪兒歌

和子賢途中



暫停雙槳傍蘋洲  
磯上漁翁雪滿頭  
釣破烟波深得趣  
生來不識世間愁

索寞襟懷不奈秋  
雕鐫佳句且忘憂  
行行恰過橋南路  
一片蘆花映碧流

桐圭柳帶正凋疎  
匹馬區區倦遠途  
腸斷不堪回首處  
寒雲影裏雁聲孤

和答國鎮

十圍便腹卧邊先  
笑傲羲皇訪昔賢  
詔下好須同舊侶

槐花香裏走連錢

寄游良臣

壯浪年來筆有神詩如開府頊清新暗中慎莫投珠璧  
道路無非按劍人

文會何時聚德星紫芝眉宇照人清錦韉並控尋春馬  
持酒憑花為解醒

夏日出郊亭和晏尚書韻

關關啼鳥樹交陰雨過西城野色侵避暑誰能陪劇飲

清歌自可滌煩襟  
稻花欲秀蟬初噤  
菱蔓初長水正深  
知有江湖杳然意  
扁舟應得共追尋

曉發吳城山

風掃陽侯雪陣平  
雨催摩詰畫圖成  
氣吞浦溆重林盡  
秋著江湖去鳥明  
厚祿故人無一字  
長年三老伴餘生  
會須滿意開懷抱  
到眼廬山不世情

兩宋名賢小集卷一百二十九

欽定四庫全書

兩宋名賢小集卷一百三十

宋 陳思 編

元 陳世隆 補

明道先生詩集

程顥字伯淳其先世居中山曾祖而下葬河南遂為  
洛陽人父昞神宗朝大中大夫顥生而秀爽舉進士  
歷鄆上元主簿晉城令專尚德化熙寧初為御史裏

行論新法不合去後又知扶溝縣坐獄逸囚責監汝  
州稅哲宗立召為宗正丞命至而卒以道學鳴世稱  
明道先生後謚純公封河南伯

遊紫金山

仙掌遠相招縈紆度石橋暝雲生澗底寒雨下山腰樹  
色千層亂天形一罅遙吏紛難久住回首羨漁樵

題安樂窩

打乖非是要安身道大方能混世塵陋巷一生顏氏樂

清風千古伯夷貧客來墨妙多攜卷天為詩豪剩借春  
儘把笑談親俗子德言猶足畏鄉人

送呂晦叔赴河陽

曉日都門颭旆旌曉風鏡吹入三城知公再為蒼生起  
不是尋常刺史行

脩禊事

盛集蘭亭舊風流洛社今坐中無俗客水曲有清音香  
篆來還去花枝泛復沉未須愁日暮天際是輕陰

金匱山房集卷一百三十  
春景

雲淡風輕近午天  
傍花隨柳過前川  
時人不識予心樂  
將謂偷閒學少年

題淮南寺

南去北來休便休  
白蘋吹盡楚江秋  
道人不是悲秋客  
一任晚山相對愁

秋日

清溪流過碧山頭  
空水澄鮮一色秋  
隔斷紅塵三十里



白雲紅葉兩悠悠

郊外即事

芳原綠野恣行時  
春入遙山碧四圍  
興逐亂紅穿柳巷  
困臨流水坐苔磯  
莫辭盃酒十分勸  
祇恐風花一片飛  
況是清明好天氣  
不妨游衍莫忘歸

秋景

閒來無事不從容  
睡覺東窗日已紅  
萬物靜觀皆自得  
四時佳興與人同  
道通天地有形外  
思入風雲變態中

富貴不淫貧賤樂男兒到此是英雄

遊月陂

月陂堤上四徘徊北有中天百尺臺萬物已隨秋氣改  
一樽聊為晚涼開水心雲影閒相照林下泉聲靜自来  
世事無端何足計但逢佳節約重陪

睢陽五老圖

大道剛明孰肯閒拳拳心志尚遺冠飯蔬飲水時行樂  
定禮刪詩國建桓終身戀闕存忠厚薄味供先表蹇蹇

鴻鈞幸得循清運  
餘烈憑人仔細看

兩宋名賢小集卷一百三十

欽定四庫全書

兩宋名賢小集卷一百三十一

宋 陳思 編

元 陳世隆 補

荆齋詩集

游酢字定夫建州建陽人也兄醇與酢俱以文行知  
名酢初受業於程顥顥知扶溝縣以道學為已任酢  
為掌其事由是學問益進又事程頤頤器之舉進士

為蕭山尉除博士僉判泉州召為監察御史尋知河  
州又知濮陽軍歷舒濠二州卒年七十一

歸雁

天末驚風急江湖野思長悲鳴愁絕塞接翼冒風霜澤  
岸多矰弋雲間乏稻粱茫然棲息地飲啄欲何鄉

感事

世事浮雲薄勞生一夢長散材依櫟社幽意慕濠梁風  
激鷹鷂迅霜殘草木黃投閒如有約早晚問耕桑

在潁川寄中立

蕭條清潁一茅廬  
魂夢長懷與子居  
五里橋西楊柳路  
至今車馬往來疎

遊寶應寺

翠律三峯帶白灣  
誰開蘭若翠微間  
竹牀雲懶禪心定  
草徑苔荒屐齒斑  
天入碧嵐成玉宇  
鳥飛青嶂出塵寰  
此中即是蕊珠境  
遮莫閒吟一解顏

山中即景

翠靄光風世界青松綠竹人家天外飛來野鳥澗中流出桃花

寶應寺讀書堂成因懷明道先生

橋西積雪度新晴卜築茅堂快落成郁郁奇花鋪野趣  
闕闕好鳥和書聲春濃嵐色無邊景水淨天花澈底清  
記得程門窻草綠至今遐想每馳情

兩宋名賢小集卷一百三十一



欽定四庫全書

兩宋名賢小集卷一百三十二

宋 陳思 編

元 陳世隆 補

寄亭詩遺

章綵字質夫建州浦城人始以世父得象蔭為將作  
監主簿復舉進士甲科知陳留縣以最擢提舉荆湖  
北路刑獄稍遷直龍圖閣知慶州明年除知同州紹

聖初徙南京改集賢殿修撰知廣州又知渭州至即築二城于石門峽江口好水河之陰二旬有二日而畢賜名平夏城靈平若方興役夏以其衆乘我師大敗之擢樞密直學士既而環慶廊延河東熙河皆築城夏人睭視不敢動實自涇原始無何夏國主與其母自將數十萬圍平夏不能克一夕遁去戎母慙虜面而還除龍圖閣學士夏國統軍嵬名阿等皆勇悍善戰索遣折可適郭成間以輕騎夜直入其帳執之

盡俘其衆種羌震駭進端明殿學士橐在涇原四凡  
置州一城砦九夏人自平夏之敗不復能軍屢請命  
乞朝貢天子赦而聽之乃為寢兵徽宗即位徙知河  
南入見留提舉中太一宮遂拜同知樞密院事以老  
授資政殿學士中太一宮使未幾而卒諡曰莊簡

運司園亭十詠并序

成都轉運司園亭蓋偽蜀時權臣故宅也清曠  
幽靜隨處皆有可樂者輒為十詩足以省憶髣

鬚云爾

山堂

古木鬱參天蒼苔下封路幽花無時歇醜石終朝踞水  
竹散清潤烟雲變晨暮何必憶山林直有山林趣

玉溪堂

堂因水得名方沼當其後漪蘭蕩榱窻戶挹花柳蟲  
魚不避人鷗鷺若相友午枕夏簟涼此樂亦奚有

雪峰樓

層構壓池塘不僭亦不偏影浮綠水靜寒凝雪山色撫  
檻接修竹連檐引蒼栢注目望長安無奈濃雲隔

海棠軒

珍葩寄幽島正對孤軒植優柔自俯仰紅綠若組織春  
酣晴日曛坐久濃香逼池面淨可鑑朝霞罩澄碧

月臺

蜀地饒夜雨輕陰多蔽天見月月無幾築臺邀嬋娟高  
疑桂影近俯視雲幄連顧盼已塵外欲挹瑤宮仙

翠錦亭

榎楠百尺餘排列拱檐際畏日自成陰隆冬寧減翠虛曠得寂理懶僻恣濃睡誰知官府中獲此冲漠味

潺玉亭

傍砌醺小渠回環是流水石蜃吐珠涎清響醒人耳風微竹影碎月皎波光起颯爽無塵囂靜適心所喜

茅庵

竹間構圓庵所向自瀟灑珍禽弄巧舌宛是居山野默

坐見真心萬緣盡虛假勿陋尋尺地茲焉息意焉

水閣

架木浮水中畧約通孤島扶疎花影反潑刺跳魚小風  
月所得多經營信云巧隱几寂無人朱蘭萃幽鳥

小亭

花邊二小亭雙跨清渠上規模雖甚隘幽僻良可賞幸  
依佳木陰未羨大廈廣不足延賞朋攜筇常獨往

兩宋名賢小集卷一百三十二



欽定四庫全書

兩宋名賢小集卷一百三十三

宋 陳思 編

元 陳世隆 補

幻雲居詩稿

鄭獬字毅夫安州安陸人皇祐五年進士第一神宗  
朝拜翰林學士為王安石所惡出知杭州徙青州提  
舉鴻慶宮卒有鄖溪集

採鳧茨

朝攜一筐出暮攜一筐歸十指欲流血且急眼前饑官  
倉豈無粟粒粒藏珠璣一粒不出倉倉中羣鼠肥

蠡中絕句

千重越甲夜城圍戰罷君王醉不知若論破吳功第一  
黃金只合鑄西施

逸句

東飛江雲北飛燕同寄青春不相見

夜來過嶺忽聞雨今日滿溪俱是花

挽老蘇先生

豐城寶劍忽飛去玉匣靈蹤自此無天外已空丹鳳穴  
世間還得二龍駒百年飄忽古無奈萬事凋零今已殊  
惆悵西州文學老一丘空掩蜀山隅

恭和御製賞花釣魚二首

輦路鮮雲五色開一聲清蹕下天來水光翠繞九重殿  
花氣濃薰萬壽杯繡幕烟深紅會合文竿風引綠徘徊

蓬山絕頂無人到詔許羣仙盡日陪

禁籞平明帳殿開華芝初下未央來人間綵鳳儀韶曲  
天上流霞滿御杯花近赭袍偏照爛魚窺仙仗亦徘徊  
蓬萊絕景何曾到自愧塵踪此一陪

奉詔赴瓊林苑燕餞太尉潞國文公出鎮西都

都門秋色滿旌旗祖帳容陪醉御卮功業迴高嘉祐末

公至和中首精神如破貝州時白居易獻裴晉公詩云

陳建儲之策精神如破貝州時

聞說風情筋力在只如

初破蔡匣中寶劍騰霜鋸海上仙桃壓露枝公之子近

州時

蔡

匣中寶劍騰霜鋸海上仙桃壓露枝

有登瀛之

命昨日更聞褒詔下別看名姓入烝彝

送公闢給事自青州致政歸吳中

公闢即程師孟

青瑣仙人解玉符秋風一夜滿江湖曾歌郢水非凡曲

未掃旄頭負壯圖

公昔北使憤然屢抑敵人

終日望君天欲盡平生

知我世應無扁舟應約元宮保瀟灑蓮涇二丈夫

嘉按元宮

保即錢塘元章簡公絳蓋嘗寓居于蘇州

送程公闢給事出守會稽兼集賢殿修撰

越州太守何瀟灑應為能吟住集仙

疑是賢

雪急紫濛催

王勃

公奉使方歸紫  
蒙獻中館名也

日長青瑣聽薰絃一時冠蓋傾離

席半醉珠璣落彩牋自恨君恩渾未報五湖終負釣魚

船

寄程公闢

念昔都門手一攜春禽幾向苧蘿啼夢回金殿風光別  
吟到銀河月影低舞急錦腰迎十八酒酣金盞照東西  
何時得遂扁舟去雪棹同君泛剡溪

雪中梅

臘梅欺寒飄玉塵早梅鬪巧雪中春更無俗艷能相雜  
惟有清香可辨真姑射仙人冰作體秦家公主粉為身  
素娥已自稱佳麗更作廣寒宮裏人

垂虹橋

在吳江又  
名利往橋

三百闌干鎖畫橋行人波上踏靈鼇  
插天埤竦玉腰濶跨海鯨鯢金背高  
路直鑿開元氣白影寒壓破大江豪  
此中自有銀河接不必仙槎八月濤

明皇

四海不搖草九重藏禍根十年慕一作傲堯舜一笑破乾

坤花萼無兄弟豺狼盡子孫潼關兵已破會憶老臣言

聞南陽呂諫議誨長逝

子文三仕去何頻一卧南陽竟沒身明主自應容直道  
皇天何事殺忠臣柱天力屈空留草貫日心存不化塵  
黃壤不知人世事為君懶哭楚江濱

讀司馬君實撰呂獻可墓誌

一讀斯文淚瀉襟磨天直氣萬千尋知君不獨悲忠義



又有兼憂天下心

罷禁林行次南都遇雨二首

雨聲飄斷忽南去  
雲勢旋生從北流  
應料涼風消息近  
蕭蕭已在樹梢頭

榴火燒空未擬休  
忽驚快雨破新秋  
晚雲淡淡趁落日  
只到楚江南岸頭

題僧文瑩所居壁

守杭  
日作

西湖頻送客  
綠波舟楫輕  
春日蘿徑靜  
浪花翻遠晴

欽定四庫全書

兩宋名賢小集  
卷一百三十三

五

杭郡閣作

雨影橫殘虹秋容陰映日寒江帶暮流曉角穿雲出峰  
藏翠如織宿鳥去無跡封書寄所懷聊托金門翼

按玉壺清

話云二詩時頗訝其氣象不逮後解杭麾將赴青社以病泊舟楚州而卒其語已先兆矣

登第後作

文闌數戰奪先鋒變化須知自古同霹靂一聲從地起

到頭身是白雲翁

公病中常夢浴玉龍池驚見體生鱗角而寤

孤山四照閣

湖山天下之絕境羣山繞湖千百重碧筍四插明鏡外  
此閣正落明鏡中當軒不置窓與檻湖光山翠還相通  
側耳似聞天仙語接手便欲翻長空

省中畫屏蘆雁

高堂傾動長江流黃蘆羣雁滿滄洲掃開長安塵土窟  
寫出江南烟水秋兩雁斜飛入空濶四雁顧慕橫沙頭  
高風拉折蒼玉榦蘆花雪盡無人收赤日飛光不敢近  
但覺爽氣屏間浮常聞畫龍入神變坐馳雲雨天地遊

只恐此雁亦飛去瀟湘萬里誰能留

遙題明州太守錢君倚衆樂亭

使君何所樂樂在南湖濱有亭若孤鯨覆以青玉鱗四  
面擁荷花花氣搖紅雲使君來游攜芳樽兩邊佳客坐  
翠茵鄞江鮮魚甲如銀玉盤千里紫絲蓴金壺行酒雙  
美人小履輕裾不動塵壯年行樂須及辰高談大笑留  
青春游人來看使君游芙蓉為楫木蘭舟橫簫短笛悲  
晚景畫簾繡幕翻中流貪歡尋勝意不盡相招却渡白

蘋洲日落使君扶醉歸游人散後水烟霏紫鱗跳復戲  
白鳥落還飛豈徒樂斯民魚鳥亦忘機使君今作螭頭  
人  
臣游人依舊歲時新空餘華榜照湖水更作佳篇誇此

構李亭

閒抱琴書構李遊仙壇古屋一筇留驛橋通市人沽酒  
湖水依城客放舟葵扇桃笙聊却暑蘋花楓葉已知秋  
坡翁仙去詩聲在寂寞林塘卧白鷗

月波樓

古壕鑿出明月具樓閣飛來兔影中野色更無山隔斷  
天光直與水相通溪藏畫舫清紋接人在荷花碧玉叢  
欲解金魚避殘暑晚雲深處待歸風

寄題靜照堂

招提去山遠還似在山家晚日惟歸鳥春風自落花空  
談消劫火醉墨灑天葩更欲拏舟去清溪月正華

田家

數畝低田流水渾一樹高花明遠村雲陰拂暑風光好  
却將微雨送黃昏

兩宋名賢小集卷一百三十三



欽定四庫全書

兩宋名賢小集卷一百三十四

宋 陳思 編

元 陳世隆 補

荅溪詩集上

劉一止字行簡歸安人七歲能屬文試太學有司欲  
舉八行一止曰行者士之常不就宣和三年登進士  
第為祕書郎遷監察御史封駁不避權貴紹興中進

敷文閣直學士致仕卒

過新開湖呈無言兄御史

整整斜斜村舍居十五五沙中鳬潛魚釣影水深淺  
高柳著行烟有無天濶雲低過平楚已覺淮音近吳語  
淮南米賤好留儂正恐不歸心更苦

盧駿元憲使寄示會稽競秀閣識舟亭二詩為各  
賦一首

蔥龍秀擁秦山落盡日春風吹嶺脚朝來領略到憲几

誰遣虛空出阿閣南臺御史去天近身與孤雲生兩角

古語孤雲兩角去天一握

胸中摸索千丈強更恐并吞有衡霍海門

山邊初落潮西興渡口沙痕高渺渺目亂翻雲濤心識  
不語迎歸橈江亭晚日風蕭騷軋鷄鳴檣相向搖平頭  
雁落沙沒腰舟人底處尋青招

### 宿溪口一首

溪聲來天邊風水共豪縱夜氣劇奔馬侵曉不能控書  
生有情癡詠雪寧忍凍胡為枕寒流故遣不成夢

欽定四庫全書

次韻無言兄卜築二首

求田問舍豈徒為晚悟前言不我欺  
地占玉杯初應卜門臨茗水宛分支  
鄉關怪客歸何早聖主思賢出不遲  
磊落胸中三萬字不應無意拯時危

石枕方牀綠浪藤清談散帶似懷冰  
蔬盤尚雜水中蟹羽翼莫揮爪上蠅  
五斗為貧真世業一廛歸隱豈人能  
冥鴻萬里今何慕應笑飢飛側翅驚

賦建安林尚能家追遠堂一首

履霜存永慕風樹寄悲惋古來孝子心百歲常輾轉雞  
豚逮親存適意寧一嚮他時穀千乘泣涕顏有覲生世  
苟如此豈得但理遣所以奉嘗事自竭巨不勉尚能七  
閩秀器識頗凝遠求官自束髮捧檄恨晚晚歸懷追養  
勤作堂近山巘欲招九原魂髣髴此息偃牛羊家自膾  
菰韭傍可剪春秋及時祀情物兩俱腴遂令里間兒輩  
詭知禮典孰先如此堂孰孝如此圉從今大而門至行  
神所馭

宋景文公之孫景雲得玉龜印有忠孝侯印四字

示詩次其韻

寶器傳家寧浪出漢爵通侯二千石懸知忠孝萃公門  
寸印便應輕尺璧虎頭飛去通神畫未免誑欺涉嘲罵  
餘不左顧非偶然渭水得璜天或者公門次第生輝光  
一一詞鋒如劍鋌龜玉正憐俱在手莫放桺中蒼兕吼  
和巒螯三子寒食少天色五字

霧雨昏不醒東風曉能酸我食日不足寧憂三日寒去

年今日時桃李半狼籍能隨里門兒買餚作寒食人言  
二月時霏雨生樹杪天色何時光要向寒食少江南舟  
輒鷓江北馬連翩經春不能賞誰云不關天春風未渠  
央花草有矜色醅醖會傾城牡丹欲傾國

次韻徐立之朝議除夜無酒二首

功名本是誤成蠅伎倆何勞更鏤冰竹屋紙窗風撼幙  
可憐挑盡讀書燈

平生豪氣忍難除尚憶咸陽五白呼詩似少陵唯欠酒

可能客舍事全無

入靈隱寺

石泉苔徑午陰涼  
手撚山花辨色香  
度嶺穿松心未厭  
好閒翻為愛山忙

次韻九日二首

懷紱欣臨柳惲州  
據牀寧羨庾公樓  
雲橫浦溆無重數  
花繞岩巒最上頭  
詩遣羊何聊共和  
語驚陶謝未知休  
自緣風物撩人意  
不為閒情作許愁



蒲團趺坐冷如秋品鼓聲傳出郡樓

聲一作風

閱世夢中知

是夢說禪頭上更安頭邦君化得俱吟咏居士年應賦  
莫休只恐官梅能動興從渠江草喚人愁

次韻春日書懷一首

水面紅雲次第鋪東君未肯向人疎興高碧嶂千尋外  
春在黃堂一笑餘只怕玉醅浮醖筭不嫌花片落襟裾  
公歸行侍甘泉宴留得新詩錦不如

贈別歸安周縣丞二首

自我居里間連牆絕來去匪我敢杜門客實莫我顧顏  
然坐空廬習懶已成痼惟有一束書遮眼慰遲暮周郎  
來何許文字得我怖淵源笑鯁桓采色隱豹霧追隨  
古汀洲山色入幽步詩文互徵逐酒肉及時具如我衆  
棄餘君意獨何慕入蘭不知芳逐臭無乃誤君亦忘機  
人足迹亂鷗鷺堂前種白蓮心境涵淨土觀空本無說  
目物自吐露往來忘時節相對兩如寓屈指說去官始  
憶三年住輟然同一笑歲月真脫兔我不記前三更問

未後句

庭前百箇竹眼見三隕籜不知如許久已復束行索君  
初先住想晚去亦不惡官身等出家隨牒即行脚笑傲  
雲烟間何適非至樂嗟我獨奈何生理自窘縛四十三  
年非醞造此大錯從今便止止萬事付莫莫張公留衣  
鉢綠叢與青蕚會當老扁舟相與同晬咏更看後五日  
放過前一著

和族兄無言題能仁寺當雲軒一首

綠樹新迴合斜窻舊邃深壺觴如粟里歲月似山陰半  
世懷清隱何年得此心借牀眠不熟酒力橫相侵

次韻予我得俸一首

祠官資薄俸肥適要清貧載酒久無客乞醢惟有鄰廣  
文寧厭肉方朔漫長身莫遣陳長到先生甌尚塵

風氣東南異

風氣東南異陰晴早晚間日光時透隙雲影半遮山掃  
逕殘紅盡開窻綠蔭還寄聲桑苧友幽興合相關

綠暗山前路

綠暗山前路  
桑桑宛宛垂稻秧  
分隴後蠶繭下山時  
白日縑車急  
中宵織婦悲  
老年官賦了  
不長一絢絲

題楊吉老知軍玉輝亭二首

向來風月清雄地  
今日升平將相家  
自啓憲扉放山入  
使君聊欲傲雲霞

世間寧有清如許  
買斷嵐烟入樽俎  
我來乘此玉輝寒  
要上峰頭呵佛祖

次韻方允迪秘監步月感懷一首

伊昔苔水濱詩酒相迎送紅蕖三百頃天遣作妙供于  
今幾何時喜懼不同夢驚心風月夕怨笛有殘弄所嘆  
老侵尋不媿官冗從當時季孟間衆識長離鳳寧知天  
一角復此尊酒共文章自千古習氣無乃重詩如朝陽  
鳴一一律呂中從游二三駿蹀躞不受輕阿威有家學  
落筆競豪縱傷時復懷舊一笑得再慟公等俱勉旃如  
我堪底用

允迪以羊膏瀹茗飲呂景實景實有詩款賞僕意

未然軌次元韻

精金不受釵釧辱瑞草何曾取膏馥乳花粥茗名已非  
薦以羊肪何太俗山林鐘鼎異天性難遣華腴偶窮獨  
森森正味苦且嚴玉質無瑕誰敢戮君家饌林多錯本  
讀罷流涎誰枯叻故令茗盃變腥羶遠想黃封雪花醞  
呼酪為奴蓬彼怒自昔爭雄巧相缺我寧不飲信我說  
獨喜君詩有神助君不見穆家兄弟故可人概以骨鯁

恐異趣

將如京師和方時敏機宜十二辰歌一首

羣兒鼠竊均有過老矣自知牛後誤成功未解聞兩虎  
援翰徒勞禿千兔佩書昂首何龍鍾靈蛇光怪蝟心胸  
馬頭二千悲遠道羊角萬里無高風秦歌嗚嗚楚猿舞  
一笑何如共雞黍謀身狗苟君勿嗤聊戲墨猪書韻語

昔人論書云瘦為  
形枯肥為墨猪

謝吳興守李端明致酒一首時寓德清



孔愉廟邊溪水長石壁巖下飛泉香居士住此幾寒暑

只見四山青又黃

大梅山法常禪師隱居餘姚南梅子真故樓有僧尋柱杖迷路至庵前問

師住此多少時師云只見四山青又黃

今年春雨摧麥芒六月稻穗乾欲

僵煩公焦勞坐黃堂何不趣公歸贊襄為時開閣陰與

陽不令此憂遺君王我居有如坐甌內四顧悒鬱不得

驤公欲令我蘓肺腸白衣致酒甚沛

缺

瓶粟未空陶氏

倉得酒且到王生鄉更招山前老漫郎

謂沈次律

渠家四柄

荷可觴

次韻建安劉彥沖學士寄茶一首

寒溪日漱枯腸潔自志窮愁慚陋劣故人不愛北苑春  
更遣清甘嚙吻類只今相望如參商武夷孤絕雲蒼茫  
底事坐閱百鳥翔要借玉川風兩腋高飛令我隨君傍  
觀大龍湫一首

峰頭雁何在井底龍不出吐作玉虹流倒挂二千尺落  
硯勢初緩漸聽轉山急喚面飛雨過著衣晨霧濕造物  
等幻戲此地真絕特勿言王事勞遇勝得小立慙愧大

尊者幾載面青壁山高不礙見泉聲不妨寂

酬王元勃舍人方智善學士求余作墨竹一首

余所居似賢堂蓋先伯祖端為竹  
製名今竹與故榜皆亡因叙此意

堂名似賢人似竹瘦節孤高焰岯谷百年人與竹俱化  
尚有諸孫來借宿家風愛竹餘底事至今十飯九不肉  
惟應說食誑枯腸更寫寒梢媚幽獨王郎散帶談清虛  
為竹造門顏不忤玄英炯炯貌臞甚門倚江干千箇綠  
兩家人物總風流石壁山前烟雨秋豈唯千首輕萬戶

胸中世襲瀟灑侯我乃癡絕非靈絕憐此霜根貫金鐵  
短綃淡墨持似公更聽哦詩聲激烈

訪石林葉少蘊觀文二首


卿雲覆其上草木爭鮮新竹露先參差晴義破蕭晨萬  
石紛拱揖靜默自主賓是中有老仙雲霞煥精神朝暮  
林壑間搜抉出怪<sup>缺</sup>風敲青筇笠雨墊烏角巾山靈指  
相謂箇是夔龍身如何輕世界蕭散意許真了知衮衣  
貴未若巖石親功名乃唾餘道德受咨詢我來追步趨

且復結勝因，劇談到羲軒。媿此真天人，

夔龍在丘壑，神物發幽祕。森然萬瓊瑰，參錯分位置。踞地猛獸伏，拏空孤鳥厲。先後相長雄，突怒疑攫噬。谷以奇自列，寧謂我獨嗜。羊酪非不珍，蓴羹有至味。鄭公信骨鯁，我但見嫵媚。種竹被嵯巖，惡木不得地。荃蘭偏九畹，歲草慘無類。造化初何心，被物自殊志。那知此巖傍，閱世等如寄。願言賦丹青，遠近同一視。

次韻王柱史題密印師寮一首

巖下風輕進竹涼  
道人身共翠梢長  
飢腸欲和春泉響  
鼻觀先參煮菜香  
何處人間有癡點  
不將身外較閒忙  
鄰家柱史哦詩夜  
未厭敲門月到牆



兩宋名賢小集卷一百三十四